

আচার্য্য দণ্ডীর কাব্যাদর্শ-মতে এগুলিতে সমস্ত (সমাসযুক্ত) রূপক। (২) নম্ননকটাখে বিষম বিশিখে-তে উপমেয় উপমান সমবিত্তিক স্বাধীন বিশেষ্যপদ, সমাসে বাধা নয়। দণ্ডিমতে এখানে ব্যস্ত (অসমাসবদ্ধ) রূপক। “ব্যথিত ধরার হ্রুপিণ্ডটি (উপমান) আমি যে রক্তজবা” (উপমেয়)—সত্যেন্দ্রনাথের এই চরণটিতে অমনি ব্যস্ত রূপক। (৩) আত্ম-গ্নানির তুমানল, লজ্জার বারিধি, কাব্যের জাল, খুসীর শতদল, বিশ্ববাসনার অরবিন্দ এবং যৌবনেরি মৌবনে—এ ছয়টিতে উপমেয় ষষ্ঠীবিত্তিকযুক্ত। আমরা বাঙলা ব্যাকরণে এইজাতীয় ষষ্ঠীর নাম দিয়েছি রূপকষষ্ঠী বা অভেদষষ্ঠী (আমার ‘সরল বাঙলা ব্যাকরণ’-এ ‘ষষ্ঠী বিত্তিক’ দ্রষ্টব্য)। সংস্কৃতে অভেদষষ্ঠী ব’লে কিছু নাই। এটি বাঙলার নিজস্ব। সংস্কৃতে উপমেয়কে তৃতীয়ান্ত ক’রে রূপকসৃষ্টির একটি পদ্ধতি আছে। সাহিত্যদর্পণে একে ‘বৈয়ধিকরণ্যে’ রূপক বলা হয়েছে—এর অর্থ উপমেয় উপমান যেখানে বিভিন্ন-বিত্তিকযুক্ত ; উদাহরণ দেওয়া হয়েছে “বিদধে মধুপশ্রেণীমিহ ক্রলভয়া বিধিঃ” (‘ক্রলভায় বিধি রচিল মধুপমালা’—শ. চ.) এই তৃতীয়াকে টীকাকার রামচরণ ‘অভেদে তৃতীয়া’ বলেছেন, যদিও ‘অভেদে তৃতীয়া’ ব’লে কোনো তৃতীয়া পাণিনি প্রভৃতি স্বীকার করেন নাই। তবু অভেদে তৃতীয়া টীকাকারকে বলতে হয়েছে এই কারণে যে অল্প কোনো রকমের তৃতীয়ায় ‘তাদাত্ম্য’ (উপমেয়-উপমানের অভেদ) প্রতিষ্ঠা সম্ভব নয় (“অল্পথা তাদাত্ম্যারোপো ন স্মাৎ”)। টীকাকারকে আমরা অভিনন্দিত করি ; কারণ তাঁরই পন্থায় ব্যাকরণসম্মত না হ’লেও ‘অভেদে ষষ্ঠী (রূপকষষ্ঠী)’ আমরা মেনে নিয়েছি বাঙলাভাষার প্রকৃতি-বিচারে। এইভাবে রূপক বাঙলায় অত্যন্ত বেশী।

(II) আলা (একাট বিষয়ের উপর বহু বিষয়ীর আরোপ হ’লে আলা-রূপক হয়) :

- (i) “শীতের ওচনী পিয়া গিরীষের বা।
বরিষার ছত্র পিয়া দরিষার না’ ॥” —বিজ্ঞাপতি।
—বিষয় পিয়া ; বিষয়ী ওচনী (গাত্রাবরণ),
বা (বাতাস), ছত্র (ছাতা) এবং না’ (নৌকা)।
[গিরীষ=গ্রীষ্ম ; দরিষা=সমুদ্র]
- (ii) “মরুভূমে প্রবাহিণী মোর পক্ষে তুমি,
রক্ষাবধু ! স্তশীতল ছায়ারূপ ধরি,
তপনতাপিতা আমি জুড়ালে আমারে !

মৃষ্টিমতী দয়া তুমি এ নির্দয় দেশে !
এ পঙ্খিল জলে পদ্ম, ভূজঙ্গিনীরূপী
এ কাল কনকলঙ্কাশিরে শিরোমণি !”

—মধুসূদন ।

(মোর = সীতার ; তুমি = সরমা)

(iii) “ছোট্ট নেবুর ফুল—

সন্ধ্যামুখের সৌরভী ভাষা,
বক্ষ্যাবুকের গৌরবী আশা,
গুপ্তপ্রেমের স্তম্ভ পিয়াসা,

বিরহের বুলবুল !”

—যতীন্দ্রমোহন ।

(iv) “হাথক দরপণ মাথক ফুল ।

নয়নক অঞ্জন মুখক তাহুল ॥
হৃদয়ক যুগমদ গৌমক হার ;
দেহক সরবস গেহক সার ॥”

—বিদ্যাপতি ।

অনুবাদ ক’রে দিলাম—

“আমার করের মুকুর তুমি, মোর কবরীর ফুল,
আঁখির কাজল, আমার ঠোঁটের টুকটুকে তাহুল,
আমার বুকের যুগমদ, আমার গলার হার,
দেহের আমার সকল তুমি, গেহের তুমি সার ।”—শ. চ.

(গৌম = গ্রীবা ; সরবস = সর্বস্ব । ‘ক’ মৈথিলভাষার ষষ্ঠী বিভক্তির চিহ্ন)

(v) “অস্তরমাঝে তুমি শুধু একা একাকী

তুমি অস্তরব্যাপিনী ।

একটি স্বপ্ন মুগ্ধ সজল নয়নে,
একটি পদ্ম হৃদয়বস্ত্রশয়নে,
একটি চন্দ্র অসীম চিস্তগগনে”

—রবীন্দ্রনাথ ।

(vi) “আমি কি তোমার উপদ্রব, অভিশাপ,

হুরদৃষ্ট, হুঃস্বপন, করলগ্ন কাঁটা ?”

—রবীন্দ্রনাথ ।

(vii) “তবু ওরাই আশার খনি,—

সবার আগে ওদের গণি,
পদ্মকোষের বজ্রমণি, ওরাই ধ্রুব স্তম্ভল,
আলাদীনের মায়ার প্রদীপ ওই আমাদের ছেলের দল ।”

—সত্যেন্দ্রনাথ ।

(viii) “শেফালীসৌরভ আমি, রাত্রির নিঃশ্বাস, ভোরের ভৈরবী”

—বুদ্ধদেব ।

২। (খ) সাজরূপক

অঙ্গসমেত অঙ্গী উপমেয়ের (বিষয়ের) উপর অঙ্গসমেত অঙ্গী উপমানের (বিষয়ীর) অভেদারোপ হ’লে সাজরূপক অলঙ্কার হয় (“অঙ্গিনো যদি সাজস্তু রূপণং সাজমেব তৎ”—সাহিত্যদর্পণ) ।

একটা উদাহরণ বিশ্লেষণ ক’রে ব্যাখ্যা করলেই সাজরূপকের তাৎপর্য সহজে বোঝা যাবে । ধরা যাক, চরণকে পঙ্কজ বলা হয়েছে অর্থাৎ উপমেয় (বিষয়) চরণে উপমান (বিষয়ী) পঙ্কজ আরোপ ক’রে রূপক করা হয়েছে । কিন্তু চরণ বলতে অঞ্জুলি ও নখের প্রশ্ন উঠতে পারে, যেহেতু এগুলি চরণের অঙ্গ । এই অঙ্গগুলি যার সে অঙ্গী (অঙ্গ+অন্ত্যার্থে ইন্) ; কাজেই চরণ অঙ্গী (অর্থাৎ উপমেয় বা বিষয় অঙ্গী) । তেমনি পঙ্কজ বলতে তার দল ও কেসরের প্রশ্নও উঠতে পারে ; কারণ, এগুলি পঙ্কজের অঙ্গ । অতএব চরণের মতো পঙ্কজও অঙ্গী (অর্থাৎ উপমান বা বিষয়ী অঙ্গী) । তাহ’লে চরণপঙ্কজ বলতে উপমেয় অঙ্গী (চরণ)-র উপর উপমান অঙ্গী (পঙ্কজ)-র অভেদারোপজনিত রূপক বোঝাচ্ছে । এইবার অঙ্গগুলিরও রূপক করা যাক :

“তান্নাজুলি যার দল, নখজ্যোতিঃ কেশর সাহার,

ধরে শিরে নৃপবৃন্দ সে চরণপঙ্কজ তোমার ।”—শ. চ.

(এটি একটি সংস্কৃত শ্লোকের অনুবাদ ।) তান্ন=আরক্তবর্ণ ।

এই সাজরূপক মোটামুটি দুইরকমের—(I) সমস্তবস্তুবিষয়ক এবং (II) একদেশবিবর্তি :

(I) যে উপমানগুলি আরোপিত হয়, তাদের সবগুলিই যদি শব্দোপাস্ত (শব্দপ্রয়োগে প্রকাশিত) হয়, তাহ’লে সমস্তবস্তুবিষয়ক সাজরূপক পাওয়া যায় । এইমাত্র ব্যাখ্যাসূত্রে যে উদাহরণটি দিলাম, সেটি এই লক্ষণাক্রান্ত । আরও উদাহরণ :

(i) “কোদালে’ মেঘের মউজ উঠেছে

আকাশের নীলগাঙে

হাবুড়ু খায় তারাবুদু ।”—নজরুল ইসলাম ।

—আকাশ অঙ্গী উপমেয় ; মেঘ, তারা আকাশের অঙ্গ এবং নীলগাঙ অঙ্গী উপমান ; মউজ (ঢেউ), বুড়ু নীলগাঙের অঙ্গ ।

(ii) “নন্দের নন্দন চাঁদ পাতিয়ে রূপের ফাঁদ
 ব্যাধ ছিল কদম্বের তলে ।

 দিয়ে হান্সসুখাচার অঙ্গচ্ছটা আঠা তার ।”—জগদানন্দ ।

—কৃষ্ণকে ব্যাধরূপে কল্পনা ক’রে রূপক করা হয়েছে। উপমেয় ‘নন্দের নন্দন’ অঙ্গী; তার অঙ্গ রূপ, হান্স, অঙ্গচ্ছটা। উপমান ‘ব্যাধ’ অঙ্গী; তার অঙ্গ ফাঁদ, চাঁদ (bait), আঠা (আঠাকাটি)—যেহেতু এগুলি বাদ দিলে ব্যাধের চলে না। অঙ্গী ও অঙ্গ সৰ্ব্বত্রই রূপক ব’লে এটি সাজরূপকের উদাহরণ।

(iii) “হৃদিবৃন্দাবনে বাস কর যদি কমলাপতি
 ওহে ভক্তিপ্রিয়, আমার ভক্তি হবে রাধা সতী ।

 মুক্তিকামনা আমারি হবে বৃন্দা গোপনারী

 দেহ হবে নন্দের পুরী স্নেহ হবে মা যশোমতী ॥”—দাশরথি ।

—হৃদয়কে বৃন্দাবন বলায় রূপক হয়েছে। রাধা, বৃন্দা, নন্দপুরী, যশোমতী—এগুলি কৃষ্ণের বৃন্দাবনলীলার অঙ্গ। কাজেই বৃন্দাবন অঙ্গী উপমান। হৃদয় উপমেয় অঙ্গী এবং তার অঙ্গ ভক্তি, মুক্তিকামনা, দেহ, স্নেহ। অঙ্গী ও অঙ্গ সৰ্ব্বত্রই রূপক হওয়ায় অলঙ্কার এখানে সাজরূপক হয়েছে।

(iv) “শোকের ঝড় বহিল সভাতে ;
 শোভিল চৌদিকে সুরসুন্দরীর রূপে
 বামাকুল ; মুক্তকেশ মেঘমালা ; ঘন
 নিশ্বাস প্রবলবায়ু ; অশ্রুবারিধারা
 আসার ; জীমূতমস্ত্র হাহাকার রব !”—মধুসূদন ।

—এখানে শোকের সঙ্গে ঝড়ের রূপক হয়েছে। শোকের আশ্রয় বা আধার বামাকুল এবং মুক্তকেশ (আলুখালুকেশ) শোকের অন্ততম প্রকাশচিহ্ন। বামাকুল, মুক্তকেশ, ঘন নিশ্বাস, অশ্রুবারিধারা, হাহাকার রব—এগুলি উপমেয় অঙ্গী শোকের অঙ্গ। তেমনি আবার ঝড় (উপমান অঙ্গী)-এর অঙ্গ সুরসুন্দরী (বিহ্যৎ), মেঘমালা, প্রবলবায়ু, আসার (বর্ষণ), জীমূতমস্ত্র (মেঘগর্জন)।

(v) “দেহদীপাধারে জ্বলিত লেলিহ ঘোবন-জয়শিখা”—অচিন্ত্যকুমার ।

—উপমেয় দেহ অঙ্গী এবং তার অঙ্গ ঘোবন ; দীপাধার (উপমান) অঙ্গী এবং তার অঙ্গ শিখা। অঙ্গীতে অঙ্গীতে এবং তাদের অঙ্গে অঙ্গে রূপক ; কাজেই সাজরূপক।

(vi) “শঙ্খধ্বল আকাশগাঙে
 গুড় মেঘের পালটি মেলে

জ্যোৎস্নাতরী বেয়ে ভূমি

ধরার ঘাটে কে আজ এলে ?”—যতীন্দ্রমোহন ।

(vii) “বক্ষবীণায় বেদনার তার

এই মত পুনঃ বাঁধিব আবার”—রবীন্দ্রনাথ ।

(viii) “অশান্ত আকাজ্জ্বলপাখী

মরিতেছে মাথা খুঁড়ে পঞ্জর-পিঞ্জরে ।”—রবীন্দ্রনাথ ।

(ix) “শোভে ভূজমৃগাল লাবণ্যসরোবরে ।

পাণি-পদ্ম প্রকাশে নখর-রবিকরে ॥”—মদনমোহন ।

(x) “গৌর নাগর রসের সাগর

ভাবের তরঙ্গ তায় ।”—উদ্ধবদাস ।

(xi) “বিশ্বব্যাপী একখানা ঘননীল ঘুমের নিকষ,

তার বুকে দীপ্যমান একটি স্বপ্নের স্বর্ণ-লেখা—

ভূমি ।”—শ্যামাপদ চক্রবর্তী ।

[‘মেঘনাদবধ’ কাব্যের ভূমিকায় দীননাথ সাজরূপকের উদাহরণ ব’লে উদ্ধৃত করেছেন—

“মেঘবর্ণ রথ ; চক্র বিজলীর ছটা ;

ধ্বজ ইন্দ্রচাপরূপী ; তুরঙ্গম বেগে

আশুগতি ।”

কিন্তু এখানে সাজরূপক বলা যায় না ; কারণ, অঙ্গী উপমেয় রথ উপমান মেঘের সঙ্গে রূপক হয় নাই । “মেঘবর্ণ রথ”=মেঘের বর্ণের মতন বর্ণ যার এমন রথ ; অলঙ্কার এখানে লুপ্তোপমা । অঙ্গীতে যখন রূপক হ’ল না তখন অঙ্গের প্রশ্নই ওঠে না ।]

(xii) “দেশে দেশে ভরমিব যোগিনী হইয়া ॥

কালামাণিকের মালা গাঁথি নিজগলে ।

কানুগুণযশ কানে পরিব কুণ্ডলে ॥

কানু-অনুরাগ রাঙাবসন পরিব ।

কানুর কলঙ্কছাই অঙ্গেতে লেপিব ॥”—চণ্ডীদাস ।

(xiii) “আমাদের জীবনের নদী—

মৃত্যুর সমুদ্রে মিশিয়াছে ।”

—ব্র

(II) একদেশবিবর্তি সাক্ষরূপক—উপমানগুলির কোনোটি বা কোনো কোনোটি যদি ভাষায় স্পষ্টভাবে প্রকাশিত না হ'য়ে, অর্থে বা ব্যঞ্জনায় প্রকাশিত হয়, তবেই হয় একদেশবিবর্তি সাক্ষরূপক।

প্রথমে একটি সংস্কৃত শ্লোকের* মুক্ত অমুবাদ ক'রে তার থেকে আলোচ্য রূপকের স্বরূপটি বুঝিয়ে দিচ্ছি—

- (i) 'লাবণ্যের মধুভরা বিকশিত তন্ত্রী বয়ান
পুরুষের আখিভুজ কেন বল না করিবে পান ?'—শ. চ.

—মুখের লাবণ্যকে মধু বললে মুখকে ফুল বলতে হয়। কিন্তু কবি মুখকে ফুল বলেন নাই; তবু অর্থে তা চমৎকার বোঝা যাচ্ছে—'বিকশিত' হওয়া মুখের পক্ষে সম্ভব নয় ব'লে এটি ফুলের দিকেই নির্দেশ দিচ্ছে। বলা বাহুল্য, ফুল উপমান (বিষয়ী)।

- (ii) "নীলপাহাড়ের ফুলদানীতে প্রফুল্ল জাফ্রানীস্থান।"
—সত্যেন্দ্রনাথ।

—নীলপাহাড়কে ফুলদানী করা হয়েছে। ফুলদানীতে ফুল থাকে; কাজেই জাফ্রানীস্থানে ফুল আরোপ করা হয়েছে—'প্রফুল্ল' শব্দটি ঐ নির্দেশই দিচ্ছে। কবি ফুল শব্দটি ব্যক্ত করেন নাই; কিন্তু অর্থে বোঝা গেল।

- (iii) "কেমনে
কবিতারসের সরে রাজহংসকূলে
মিলি করি কেলি আমি...?" —মধুসূদন।
- (iv) "আকাশের সর্বরস রৌজরসনায়
লেহন করিল সূর্য।" —রবীন্দ্রনাথ।

২। (গ) পরম্পরিত রূপক

যদি একটি উপমেয়ে উপমানের আরোপ অত্র উপমেয়ে তার উপমানের আরোপের কারণ হয়, তবেই হয় পরম্পরিত রূপক ("যত্র কশ্চিদারোপঃ পরারোপণকারণম্। তৎ পরম্পরিতম্..."—সাহিত্যদর্পণ)।

[এ অলঙ্কারে রূপকে রূপকে কার্যকারণভাবে পরস্পরা অর্থাৎ ধারা থাকে ব'লে এর নাম পরম্পরিত। সাক্ষরূপকের মতো অঙ্কের বা অঙ্গীর প্রশ্ন এতে ওঠেই না।]

* "লাবণ্যমধুভিঃ পূর্ণমাস্তমস্তা বিকশ্বরম্।
লোকলোচনরোলম্বকদম্বৈঃ কৈর্ন পীয়তে।"
—রোলম্ব—ভ্রমর; কদম্ব—সমূহ।

- (i) “কেমনে বিদায় তোরে করি, রে বাছনি,
আধারি হৃদয়াকাশ তুই পূর্ণশশী
আমার ?” —মধুসূদন।

—তুই (ইন্দ্রজিৎ)-তে পূর্ণশশীর আরোপই হৃদয়ে আকাশারোপের কারণ।

- (ii) “চেতনার নটমঞ্চে নিদ্রা যবে ফেলে যবনিকা,
অচেতন-নেপথ্যের অভিনয় কর প্রযোজন।”—বুদ্ধদেব।

—চেতনাকে নটমঞ্চ ব'লে রূপক করাই নিদ্রাকে যবনিকা এবং অচেতনকে নেপথ্য ব'লে রূপক করার কারণ।

- (iii) “শ্যামশুকপাখী সুন্দর নিরখি
(রাই) ধরিল নয়নফাঁদে।
হৃদয়পিঞ্জরে রাখিল তাহারে
মনহি শিকরী বেঁধে ॥” —চণ্ডীদাস।

—শ্যামকে শুকপাখী ব'লে রূপ। ফরাই নয়ন, হৃদয় এবং মনকে যথাক্রমে ফাঁদ, পিঞ্জর এবং শিকল ব'লে রূপ। যার কারণ। এখানে অঙ্গাদী সম্বন্ধ না থাকায় সাদৃশ্যরূপক হ'ল না ; কার্যকারণ-সম্পর্ক থাকায় পরম্পরিত রূপক হ'ল।

- (iv) “বিশ্বুতির পার হ'তে অবচেতনার
ক্ষীণ-ভোয়া তটিনী-উজানে
অতিদূর অতীতের জীবনতরঙ্গীখানি তার
ধীরে ধীরে আসিতেছে স্মৃতিতটপানে।” —শ্যামাপদ।

—বিষয় (উপমেয়) চারটি : বিশ্বুতি, অবচেতনা, অতীতের জীবন এবং স্মৃতি ; এদের যথাক্রমিক উপমান অর্থাৎ বিষয়ী : পার, তটিনী, তরঙ্গী এবং তট। জীবনকে তরঙ্গী ব'লে রূপক করাই অশ্রুতরূপকগুলির কারণ। অঙ্গাদী সম্বন্ধ নাই। রূপক পরম্পরিত।

- (v) “এখনো যে দেহ রূপোর পাত রে,
হীরের টুকরো আখি ;
মরণের শীত নিবারণ করে
বরফের কাঁথা ঢাকি !”

—হাটে বিক্রীর জন্তে আনা বরফটাকা মাছের কথা। শূলান্ধর অংশে পরম্পরিত রূপক। প্রথমাংশের ছটিকে বলতে পারতাম প্রতীয়মান উৎপ্রেক্ষা ; কিন্তু ‘যে’ অব্যয়টি থাকায় রূপক ছাড়া অন্য কিছু বলা চলল না।

(vi) “যদিও সকল হান্স-ফেনপুঞ্জতলে
জানি ক্ষুর ব্যথাসিদ্ধু দোলে।”—প্রেমেঞ্জ ।

(vii) “ষড়ধ্যায়ের বিশ্বকাব্যে নবরসে মহামেলা,
মাঝখানে তার এই নিদাঘের বীররৌদ্ৰের খেলা।”
—কালিদাস ।

—বিশ্বকে কাব্য ব'লে রূপক করায় নিদাঘ (গ্রীষ্ম)-কে বীররৌদ্ৰ রস ব'লে
রূপক করতে হয়েছে। প্রথম রূপকটি অপর রূপকের কারণ হওয়ায় অলঙ্কার
পরম্পরিত রূপক হয়েছে।

(viii) “অঙ্ককার মহার্গবে সৃষ্টি শতদল”—রবীন্দ্রনাথ ।

(ix) “বীর্যসিংহ 'পরে চড়ি জগদ্ধাত্রী দয়া”—রবীন্দ্রনাথ ।

—দয়াকে জগদ্ধাত্রী বলা হয়েছে। এই কারণে জগদ্ধাত্রীর বাহন সিংহকে
বীর্যে আরোপিত ক'রে রূপক করা হয়েছে। কাজেই সমগ্রটি পরম্পরিত
রূপক ।

(x) “নয়নচকোর বহু। খুশীশীবর
কয়ল অমিয়-পান।” —বিষ্ণাপতি ।

(xi) “হুসহ বিরহ সাগরে বড়াঈ
তোক্লেসি আন্নার ভেলা”—শ্রীকৃষ্ণকীর্তন ।
(তোক্লেসি আন্নার = তুমি হও আমার)

(xii) “সৌন্দর্য-পাথারে
যে বেদনাবায়ুতরে ছুটে মনোভরী
সে বাতাসে কতবার মনে শঙ্কা করি,
ছিন্ন হ'য়ে গেল বৃষ্টি ছন্দনের পাল।” —রবীন্দ্রনাথ ।

(xiii) “অতি দুর্গম সৃষ্টিশিখরে
অসীম কালের মহাকন্দরে
ঝঝর সঙ্গীতে,
স্বরতরঙ্গ যত গ্রহতারা
ছুটিছে শূন্যে উদ্দেশহারা—” —রবীন্দ্রনাথ ।

(xiv) “তাই দীর্ঘশ্বাসের ধোঁয়ায় কালো করছো ভবিষ্যৎ আর
অনুশোচনার আগুনে ছাই হচ্ছে উৎসাহের কয়লা।”
—স্বকান্ত ভট্টাচার্য ।